

La qualitat en la medischna moderna

Nagina mancanza da personal

DA LUCAS DEPLAZES / ANR

■ **Anc adina succedan memia blers sbagls tar tractaments medicinals. Ils ospitals e diversas organisaziuns fan grondas stentas per als evitar. Clers criteris da qualitat e la trasparenza mancan.** En vista a questa situaziun ha la «Societad svizra per il controlling da la medischna» organisà il venderdi passà a Berna ina dieta d'infurmaziun e da discussiun. Prendi part han exponents da la politica, dals chantuns, dals ospitals e da las organisaziuns dals medis.

Ruth Humbel, cussegliera naziunala (pcd/AG), ha retschertgà tar divers ospitals quant che custa ina operaziun usitada per remplazzar las giugadiras dals chaluns cun implantats. Ella saja stada fitg surstada da constatar ina gronda differenza dals custs d'in ospital a l'auter. Ina tala operaziun sut las medemas cundiziuns custa tranter 7400 francs ed 11 600 francs. Nagin possia declarar ina tala differenza dals custs. Al pacient po quai esser tuttina. El na paja quasi nagut. Ils gronds custs surpiglian ils chantuns e las cassas da mal-sauns. Il quint pajan la finala ils pajataglias ed ils assicurads cun premias che s'augmentan senza fin.

Talas situaziuns han intimà chantuns e diversas organisaziuns gia l'onn 2003 da proponer a la confederaziun da finanziar ils custs dals ospitals en l'entira Svizra tenor ils medems criteris. Gia l'onn 2007 ha il parlament federal deliberà la lescha davart l'introducziun da las pauschalas per cas e concedì als chantuns ed als ospitals tschun onns da preparaziun. La mesadad dals chantuns è sa messa a la lavur (rem. red.: era il Grischun) e fatg lur pensums. L'autra mesadad ha laschà ir il temp e schizunt provà d'impedir l'introducziun l'ultimument. Er las organisaziuns dal personal han annunzià grondas reservas cunter la finanziaziun cun pauschalas per cas e fatg attent a la problematica davart la qualitat. Dapi l'introducziun dal nov sistem per l'entschatta da quest onn èsi dentant restà quiet.

Nagin institut federal da qualitat

En ina intensiva discussiun al podì èn s'exprimids exponents dals divers secturs. Ils ospitals adatteschan il process da lavur tut tenor las experientschas. Grondas stentas da qualitat fan ils producents da medicaments e las instituziuns che giuditgeschan ils meds artificials sco implantats ed apparaturas tecnicas per pazients. «L'Association nationale pour le développement de la qualité dans les hôpitaux e les cliniques (anq)» controlla sistematicamain la qualitat. Tut ils pledaders èn s'exprimids cunter la creaziun d'in institut federal da qualitat. Decisiv per la quali-



Per cussegliera naziunala Ruth Humbel èn las grondas differenzas dals custs tranter ils divers ospitals nunchapiblas.

FOTO L. DEPLAZES

tad saja ina buna diagnosa e main il dumber da personal, è vegnì punctuà.

Memia blers medis

Sut il titel «Damain medischna – dat meglra qualitat» ha cumpareglià *Werner Widmer* da la fundaziun «Diakoniewerk Neumünster – Schweizerische Pflegerinnenschule» il dumber dals medis e dal personal da tgira en divers pajais e constatà che la Svizra dispona da resursas surdimensionadas en il sector da la sanadad publica.

Sin 10 000 abitants datti en Svizra 41 medis, en la Germania ed en Frantscha 35, en ils Stadis Unids da l'America 27. Il dumber da medis è s'augmentà tranter 2000 e 2010 da 25 216

sin 30 273 u plus 20,1%. En quest interval è la populaziun svizra creschida per 9,2%. Sin 10 000 abitants dispona la Svizra cun 160 persunas da la pli auta quota da personal da tgira: Norvegia 148, Germania 108, Frantscha 89, America 98, Austria 78, Italia 65. Widmer ha fatg attent a las grondas differenzas tranter las regiuns. Praticeschan en la regiun dal Lai da Genevra 244 medis ambulants sin 100 000 abitants, dispona la Svizra centrala mo da 140 e la Svizra orientala da 152. Tenor Widmer datti tractaments betg necessaris che mancan en auters lieus e custanbler. Ina ura en la sala d'operaziun custa 2500, in di en l'ospital custa en media 1400 francs.